

CONVENIO DE COLABORACIÓN ENTRE O SERVIZO GALEGO DE SAÚDE E COLEXIO SEK-ATLÁNTICO PARA A REALIZACIÓN DE ACTIVIDADES DE VOLUNTARIADO NA XERENCIA DE XESTIÓN INTEGRADA DE PONTEVEDRA E O SALNÉS

Pontevedra, a 20 de novembro de 2018

REUNIDOS

Dunha parte, D. JESÚS VÁZQUEZ ALMUÍÑA, Conselleiro de Sanidade e Presidente do Servizo Galego de Saúde, actuando no nome e representación deste, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e do seu Presidente e de conformidade co Decreto 43/2013, do 21 de febreiro, polo que se establece a estrutura orgánica do Servizo Galego de Saúde, así como co establecido na Lei 1/2016, do 18 de xaneiro, de transparencia e bo goberno e a Lei 40/2015, do 1 de outubro, do Réxime Xurídico do Sector Público.

Doutra parte, D. JACOBO OLMEDO SUÁREZ-VENCE, con DNI 35305069T, actuando no nome e representación do Colexio SEK-Atlántico, con C.I.F. B36196723 , en calidade de director do mesmo e facendo uso das facultades que lle foron conferidas en escritura autorizada por notario xxxxxx en setembro de 2008 con número de protocolo *“Representar a la Sociedad ante las Administraciones Públicas, cualquiera que sea su grado, jurisdicción y competencia, con las más amplias facultades”* e con domicilio, a estes efectos, en xxxxxx.

Ambas as dúas partes, actuando coa representación que legal e regulamentariamente teñen conferida, no exercicio das funcións que teñen legalmente atribuídas, recoñécense reciprocamente a capacidade legal suficiente para obrigarse e formalizar o presente convenio de colaboración

MANIFESTAN

I.- Que a Xestión Integrada de Pontevedra e O Salnés (en diante XERENCIA DE XESTIÓN INTEGRADA) pertence á rede pública do Servizo Galego de Saúde e ten entre os seus fins contribuír a mellorar o estado de saúde da poboación cos máximos niveis de calidade, utilizando fórmulas de xestión enfocadas á eficiencia e prestixiando con todo iso ao sector público ao que pertence.

Así mesmo, a XERENCIA DE XESTIÓN INTEGRADA de Pontevedra e O Salnés ten encomendada a xestión da atención pediátrica, que inclúe a escolarización dos pacientes ingresados.

II.- No ámbito estatal, a Lei 45/2015, do 14 de outubro, do Voluntariado dá cobertura a unha acción voluntaria sen adxectivos, sen excluír ningún ámbito de actuación nos que nestes anos consolidouse a súa presenza e favorece que poida promoverse non só no Terceiro Sector, senón noutros ámbitos máis novedosos, como son as empresas, as Universidades ou as propias Administracións Públicas.

Igualmente, no ámbito da Comunidade Autónoma, a Lei 10/2011, de 28 de novembro de acción voluntaria sinala que a participación da cidadanía na vida política, económica cultural e social é unha aspiración propia de calquera sociedade moderna e democrática. Na actualidade constitúe tamén un compromiso que deben cumprir os poderes públicos, que se atopan compelidos a facilitaren e promoveren as condicións necesarias para facer efectiva a devandita participación.

Esta participación social vese consolidada cando as persoas e os grupos nos que se integran desenvolven por si mesmos, e dunha forma totalmente libre, altruísta e solidaria, actuacións que procuran o benestar social e a mellora da calidade de vida da comunidade. Cando estas actuacións deixan de ser un acto illado e espontáneo, e pasan a efectuarse nun marco institucional organizado e mediante entidades creadas ad hoc, é cando ten lugar o desenvolvemento dunha acción voluntaria.

A acción voluntaria é manifestación explícita da conciencia solidaria da cidadanía e fortalece a convivencia democrática, e debe ser, como xa queda dito, promovida polos poderes públicos. Son estes os que teñen a responsabilidade de crear as estruturas e o soporte legal preciso que posibilite, dende a liberdade, que a sociedade civil interveña no desenvolvemento de actividades e sectores de interese xeral e mais na consecución dos intereses públicos mediante a acción voluntaria.

III.- No artigo 5.2 da Lei 10/2011, de 28 de novembro, recóllese que, aos efectos desta lei, considéranse incluídas dentro do ámbito da acción voluntaria a realización de actividades de interese xeral vinculadas coas de natureza sociosanitaria.

Por maior abastanza, o artigo 27.4º da Lei 8/2008, de 10 de xuño, de Saúde de Galicia, dispón que a colaboración das organizacións de voluntarios e cooperantes coas organizacións sanitarias adscritas ou vinculadas á Consellería de Sanidade poderá instrumentarse, no seu caso, a través de convenios, concertos, programas de subvencións e outros, de conformidade coa natureza da colaboración que pretenda establecerse. Ningunha colaboración, individual ou colectiva, implicará relación laboral coa administración sanitaria.

IV.- O Servizo Galego de Saúde a través da XERENCIA DE XESTIÓN INTEGRADA de Pontevedra e O Salnés, ao desenvolver esta actividade de voluntariado, cómpre co estipulado na Lei 10/2011, de 28 de novembro, de acción voluntaria e na Lei 8/2008, do 10 de xuño, de Saúde de Galicia, especialmente no seu artigo 27.

V.- O Colexio SEK-Atlántico é unha institución con personalidade xurídica propia e plena capacidade de obrar para o cumprimento dos seus fins, de carácter educativo e social, establecendo compromiso con diversas institucións e entidades de traballo social para colaborar con elas de diversas maneiras, sempre có ánimo e obxectivo de que os seus alumnos teñan contacto con distintas realidades sociais.

VI.- Como fins principais do Colexio SEK-Atlántico, dentro do ámbito educativo do Bacharelato Internacional o proxecto curricular contempla actuacións de voluntariado enmarcadas no Proxecto das CAS, actividades de servizo á comunidade, e requisito imprescindible para que os alumnos acaden a súa titulación final.

VII.- Os Estatutos do Colexio SEK-Atlántico contemplan que para o mellor cumprimento dos seus fins é necesario acadar acordos de colaboración con distintas entidades que permitan aos seus alumnos axudar nas actividades organizadas por elas.

VIII.- O Servizo Galego de Saúde e a XERENCIA DE XESTIÓN INTEGRADA de Pontevedra e O Salnés, sensible aos fenómenos que poidan redundar nunha maior cohesión social, recoñece o importante papel do voluntariado como mecanismo canalizador das lexítimas inquiredanzas das persoas e das organizacións sen ánimo de lucro no desempeño de actividades altruístas e para o logro dunha sociedade mais solidaria. Por iso, cada día é máis necesario promover e coordinar o voluntariado dende postulados flexibles que permitan unhas regras básicas para o desenvolvemento da súa acción en campos como a saúde.

IX.- O Servizo Galego de Saúde a través da XERENCIA DE XESTIÓN INTEGRADA de Pontevedra e O Salnés comprométese a prestar a súa colaboración para o desenvolvemento da actividade do voluntariado a través do programa de voluntariado na Escola Hospitalaria, en consonancia co estipulado na mencionada Lei 10/2011, de 28 de novembro, de acción voluntaria e na Lei 8/2008, de 10 de xuño, de Saúde de Galicia, especialmente no seu artigo 27.

De conformidade co anteriormente exposto e seguindo este amplo senso de colaboración, as entidades comparecentes decidiron cooperar nas actividades que actualmente desenvolven, recoñecéndose a representación que ostentan e acordando formalizar o presente Acordo de Colaboración conforme ás seguintes:

CLAÚSULAS

PRIMEIRA.- OBXECTO

O presente convenio de colaboración regula a actuación do voluntariado do Colexio SEK-Atlántico na Escola Hospitalaria do Servizo Galego de Saúde (XERENCIA DE XESTIÓN INTEGRADA de Pontevedra e O Salnés), co fin de conseguir unha maior calidade de vida para os pacientes ingresados no Servizo de Pediatría e as súas familias.

SEGUNDA.- FUNCÍONS DOS VOLUNTARIOS/AS

As principais funcións a desenvolver polos voluntarios/as e en concreto polos voluntarios e voluntarias para a consecución do obxectivo son:

- Acompañamento ao/a enfermo/a e á súa familia cando as condicións do/a paciente o faciliten e non exista impedimento por parte dos afectados/as e do persoal sanitario responsable.
- Suplencia do/da coidador/a primario/a para facilitar o seu descanso físico e emocional.
- Apoio ao persoal sanitario mediante tarefas complementarias ás dos profesionais, sen interferir nestas últimas nin realizar tarefas correspondentes aos profesionais.
- Comunicación ao coordinador/a do voluntariado de situacións que puideran precisar a intervención de profesionais da XERENCIA DE XESTIÓN INTEGRADA, para a súa derivación ao profesional correspondente.
- Aqueloutras que poidan xurdir no habitual desenvolvemento do programa e contén coa aprobación da XERENCIA DE XESTIÓN INTEGRADA de Pontevedra e O Salnés.

Estas funcións serán desenvolvidas en coordinación e baixo a supervisión do persoal de enfermaría do Servizo de Pediatría.

TERCEIRA.- OBRIGA DAS PARTES

1. Compromisos do Colexio SEK-Atlántico:

- Achegar, a súa costa, os recursos materiais necesarios para o desenvolvemento do programa do voluntariado ou outros de similar consideración que puideran ser necesarios.
- Achegar o persoal voluntario necesario para a correcta atención dos/as pacientes.
- Nomear un/unha coordinador/a de voluntariado, que será responsable da actuación dos seus membros e será o/a interlocutor/a válido/a ante o/a representante nomeado/a pola XERENCIA DE XESTIÓN INTEGRADA.
- Seleccionar e formar aos voluntarios/as que participen no desenvolvemento da actividade.
- Achegar identificación para os/as voluntarios/as
- Prover dos seguros de Accidentes e Responsabilidade Civil aos voluntarios/as.
- Fomentar a presenza dos/as voluntarios/as en todos aqueles foros onde se traten temas relacionados co voluntariado infantil
- Cumprir en todo momento a lexislación vixente, tanto a nivel nacional como autonómico, en materia de voluntariado.

2. Compromisos do Servizo Galego de Saúde:

- Facilitar o acceso dos voluntarios/as nas áreas do Servizo de Pediatría que sexan autorizadas polo persoal sanitario.
- Facilitar un espazo para que os voluntarios e voluntarias e coordinador/a de voluntariado poidan deixar e coller a indumentaria para as súas labores, que non implicará cesión do mesmo.
- Proporcionar a información e os medios necesarios ao persoal sanitario do hospital para que o maior número de pacientes e familias poidan ter acceso aos servizos de voluntariado.
- Difundir o Programa aos/ás profesionais sanitarios do Servizo de Pediatría, así como todos aqueles que estean implicados no desenvolvemento do mesmo.

CUARTA.- INEXISTENCIA DE RELACIÓN LABORAL

As obrigas sociais e laborais respecto do persoal que aporte o **Colexio SEK-Atlántico** corresponderán única e exclusivamente a esta, sendo tanto o Servizo Galego de Saúde como a XERENCIA DE XESTIÓN INTEGRADA de Pontevedra e O Salnés totalmente alleos ás devanditas relacións laborais.

A subscrición do presente convenio non comporta relación laboral ou de calquera outro tipo entre o persoal e voluntarios do **Colexio SEK-Atlántico** e o Servizo Galego de Saúde.

O **Colexio SEK-Atlántico** garantirá que as persoas que integren o equipo de traballo teñan a formación, cualificación e dimensións adecuadas para a realización dos traballos convidados e non poderán desenvolver en ningún caso actividades que sexan propias do persoal pertencente ao Servizo Galego de Saúde.

QUINTA.- PREVENCIÓN DE RISCOS LABORAIS

En cumprimento do disposto no artigo 24 da Lei 31/95 de 8 de novembro, de Prevención de Riscos Laborais (LPRL) e no Real Decreto 171/2004, de 30 de xaneiro, polo que se desenvolve o artigo 24 da LPRL en materia de coordinación de actividades empresariais o Servizo Galego de Saúde e o **Colexio SEK-Atlántico** obríganse a facilitar as medidas de coordinación que acorden os respectivos Servizos de Prevención, a comunicarse as incidencias ou modificacións que se produzan durante o desenvolvemento da actividade, para os efectos de garantir o cumprimento da lexislación vixente.

SEXTA.- COMUNICACIÓN DE DATOS ENTRE AS PARTES

De conformidade co establecido no Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e pola que se deroga a Directiva 95/46/CE así como o resto da lexislación vixente nesta materia, ambas partes comprométense a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude do presente convenio e ao deber de gardalos, sen que podan utilizalos para usos diferentes aos previstos o mesmo, fan constar, de maneira expresa, que velarán polo cumprimento da normativa de protección de datos persoais de aplicación en cada caso. Estas obrigas subsistirán incluso despois de finalizar as relacións negociables entre as partes.

Cada parte responderá directamente ante a Axencia Española de Protección de Datos, así como ante as outras partes, das sancións pecuniarias e responsabilidades de todo tipo que dos propios incumprimentos nesta materia se deriven por ela mesma.

SÉTIMA.- HORARIO DE COBERTURA

As actividades realizaranse no horario que non obstaculice o funcionamento do centro hospitalario, debendo contar coa aprobación expresa do responsable do Servizo de Pediatría. Con preferencia establécese en quenda de tarde: de 17:00 a 19:00 horas. Non obstante, poderá ser revisado para adaptarse ás necesidades de pacientes e profesionais.

OITAVA.- COMISIÓN MIXTA DE SEGUIMIENTO

Co fin de velar polo cumprimento xeral das cláusulas do presente acordo de colaboración e coordinar as accións previstas, crease unha Comisión Mixta entre o **Colexio SEK-Atlántico** e a XERENCIA DE XESTIÓN INTEGRADA de Pontevedra e O Salnés, coa seguinte composición:

- Por parte do Colexio SEK-Atlántico: o director/a do mesmo ou persoa en quen delegue, e un/unha técnico nomeado/a por aquela.
- Por parte da XERENCIA DE XESTIÓN INTEGRADA: a persoa que ocupe a Xerencia ou persoa en quen delegue, e un/unha técnico nomeado por aquela.

No suposto de desacordo entre as partes que compoñen esta Comisión, o/a Presidente do Servizo Galego de Saúde será competente para resolver as distintas cuestións que foran obxecto de diverxencia. Dita resolución pode ser impugnada ante a xurisdición contencioso-administrativa.

Serán competencias xerais desta Comisión:

- a) A avaliación do desenvolvemento do presente acordo de colaboración
- b) A preparación de sucesivos programas
- c) A proposta da prórroga do acordo de colaboración ou da súa rescisión
- d) O estudo e asesoramento respecto a todas as cuestións que sexan sometidas á Comisión por calquera das partes

Esta Comisión reunirse unha vez ao ano e nas circunstancias excepcionais que así o aconsellen.

NÓVENA.- FINANCIACION

O presente convenio non leva compromiso de gasto para o Servizo Galego de Saúde/ Xerencia de Xestión Integrada de Pontevedra e o Salnés e por este motivo non precisa consignación orzamentaria.

DÉCIMA.- DIFUSIÓN

Na difusión que o Servizo Galego de Saúde/XERENCIA DE XESTIÓN INTEGRADA de Pontevedra e O Salnés e **Colexio SEK-Atlántico** fagan, a través de calquera medio de comunicación social, das accións derivadas da aplicación do presente acordo de colaboración, farase constar expresamente que estas se realizan en virtude da colaboración acordada entre a XERENCIA DE XESTIÓN INTEGRADA de Pontevedra e O Salnés e o **Colexio SEK-Atlántico**.

En todo caso, o uso e emprego da imaxe corporativa institucional da Xunta de Galicia, da Consellería de Sanidade ou do Servizo Galego de Saúde, deberá respectar o disposto no Decreto 409/2009, de 5 de novembro, polo que se aproba o uso dos elementos básicos de identidade corporativa da Xunta de Galicia e na Orde de 17 de abril de 2007 pola que se establecen o símbolo, o logotipo e o manual de identidade corporativa do Servizo Galego de Saúde.

DÉCIMA PRIMEIRA.- VIXENCIA, PRÓRRROGA E DENUNCIA

O presente convenio entrará en vigor ao día seguinte ao da súa sinatura e terá unha vixencia dun ano.

Este convenio prorrogarase por acordo unánime das partes por períodos anuais, conforme ao estipulado no artigo 49. 1. h) da Lei 40/2015, do 1 de outubro, do Réxime Xurídico do Sector Público, en caso de non haber denuncia por ningunha das partes.

DÉCIMO SEGUNDA.- RESOLUCIÓN

Serán causas de resolución do presente convenio as seguintes:

- O incumprimento manifesto total ou parcial das obrigas asumidas por calquera das partes
- A denuncia expresa dalgunha das partes, con previo aviso de, como mínimo, dous meses de antelación á finalización do prazo de vixencia do convenio ou de calquera das súas prórrogas
- O acordo mutuo das partes
- O transcurso do prazo estipulado sen que se desenvolva o convenio

DÉCIMO TERCEIRA.- RÉXIME XURÍDICO E XURISDICIÓN

O presente convenio ten natureza administrativa. As dúbidas e controversias que xurdan con motivo da interpretación e aplicación do presente convenio e que non poidan ser resoltas no seo da Comisión de Seguimento, resolveranse ante a Xurisdición Contencioso-Administrativa.

DÉCIMO SEGUNDA.- REXISTRO DE CONVENIOS, TRANSPARENCIA E BO GOBERNO

A firma deste convenio de colaboración leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e a Lei Galega 1/2016, do 18 de xaneiro, de transparencia e bo goberno.

O presente Convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xullo, polo que se regula o Rexistro de Convenios da Xunta de Galicia.

E en proba de conformidade cos termos do presente documento, ambas as partes asínano por triplicado e a un só efecto, no lugar e data sinalados no encabezamento.

O presidente do Servizo Galego de Saúde
(P.D de data 20 de novembro de 2018)

O xerente de Xestión Integrada de Pontevedra e o
Salnés

O director do Colexio SEK-Atlántico

José Ramón Gómez Fernández

Jacobo Olmedo Suárez-Vence